

HEADLINES

1. Chief Minister Pu Lalduhoman Intensified IEC Campaign on HIV thawh hnihna leh HIV Test Drive Campaign vawiin khan a hawng.
2. Har Ghar Tiranga pualin vawiin khan Mizoram hmun hrang hrangah Hnam Puanzar ngaihhlut inzirtirna puala hun hman zui a ni .
3. Lok Sabha Speaker Om Birla chuan a chenna ina pawisa tam tak an chhara avanga eirua puh High Court Judge Justice Yashwant Varma chhui tur member pathum awmna committee a din.
4. Sawrkar laipui chuan Odisha, Punjab leh Andhra Pradesh-a Semiconductor project cheng vaibelchhe sang li leh 594 senna tur a pawm.

<><><>

INTENSIFIED IEC CAMPAIGN

Chief Minister Pu Lalduhoman uar leh zuala HIV laka invenna beihpui thlakna=Intensified IEC Campaign on HIV thawh hnihna leh HIV Test Drive Campaign vawiin khan a hawng. Vawiina I&PR Auditorium Aizawla hemi puala inkhawmah thusawiin Chief Minister chuan, HIV hi kai tawh chuan a tihdamna a awm lova. A laka himna awm chhun chu invên chauh a ni a ti a. he natna hi hmun tinah a awm tawh avangin thingtlâng leh hmun kilkhâwr zâwk thleng phâk ngeia hma lâk a ngai a to.

Mizoram chu HIV/AIDS invên dan hre zau pâwl tak ni a târlan a ni chungin HIV kai an tam viau lawi si avangin Awareness nei tha, zawm tha si lo state angin a lang mek, hei vang hian hmalakna awmze nei, zawm hlawh lehzual awareness pek dan tur ngaihtuah chhuah a tul a ti.

Health and Family Welfare Minister Pi Lalrinpuii pawhin thusawiin HIV hrik chuan mi nawlpui a luhchilh tawh a ti a, mi nun pel he leh hum sual daite chauh vei tura dah bik a hun tawh loh thu sawiin HIV natna veite chuan mi dangte anga an damchhung hun hahdam tak leh hlim taka an hman ve theih nan hnualsuat mai lova mi pangngai anga en an mamawh tih a sawi bawk.

He inkhawma Mizoram State Aids Control Society Project Director Dr. Jane R Ralte tarlan danin, kum 1990 atanga 2025 thlengin Mizoramah HIV positive mi 32,994 hmuhchhuah a ni tawh a, kum kalta 2024 April thla atanga kumin June thla inkarah HIV positive mipa 1602 leh hmeichhia 869 hmuhchhuah niin hmeichhe zinga 140 te chu nau pai lai mek an nih thu a sawi bawk.

<><><>

NDMA

National Disaster Management Authority (NDMA) official ten vawiin khan Aizawl District Disaster Management Authority (DDMA leh Lunglei District hotute an kawm a, .

NDMA Jt Advisor Dr.SK Jena chuan Chhiatrupna an hmachhawn dan te, a pumpelh tura in inpuahchahna te, chhiatna thleng avanga harsatna a thlen te tiziaawm tura hma lak dan te hriat an duh tih a sawi a, chhiatna thleng chungchang a tul pawimawhte an sawiho a ni.

NDMA Official te hian naktukah Champhai leh Khawzawl District an tlawh ang. Disaster Management & Rehabilitation (DM&R) Minister Prof. Lalnilawma pawhin NDMA hotute hi a pisa-ah a kawm a ni. Kan corr report lo ngaitla ang.

DM&R Minister Prof. Lalnilawma leh NDMA hotute inkawmnaah hian Mizoram chu khuarel chhiatna thlen nasatna hmun a nih anga district tina khuarel chhiatna hrang hrang leimin, tuilian, lirnging leh adangte thlen theihna enho a ni a. Mizoram

chhunga khuarel chhiatna liantham lo thlengtawh hrang hrangte – kum 1992 Hlimen leimin, kum 1995 Siaha leh Lawngtlai-a ruahpui vanawn avanga chhiatna, kum 2013 Laipuitlang leimin, kum 2017 tuilian leh kum 2020-a Champhai-a lirnghingte pawh chipchiar taka enho a ni a. DM&R dept official-te leh NDMA hotute chuan khuarel chhiatna avanga harsatna thleng thei tihziaawm dan leh chhawmdawlna kawnga chak zawka thawhho dan tur hrang hrangte an sawiho a ni.

<><><>

HAR GHAR TIRANGA

Har Ghar Tiranga pualin vawiin khan Mizoram hmun hrang hrangah Hnam Puanzar ngaihhlut inzirtirna puala hun hman zui a ni a. Sawrkar Laipui, Ministry of Culture thuchhuak angin kumin Independence Day vawi 79na puala Har Ghar Tiranga – Hnam puanzar ngaihhlut inzirtirna hun hi vawiin khan Aizawl ah chuan Art & Culture Department bultumin Vanapa Hall ah buatsaih a ni a, he hun hawngtu Art & Culture Minister Pu C. Lalsawivunga chuan thusawiin, India hnam puanzar chuan entirna thûk tak a nei a ni, a ti a. India ram chu khawvel ram dangte nena tehkhin pawha ram lian tak, mihring tamna ber leh a mi chengte pawh tawng hrang leh zia râng hran hran nei ni chung siin India hnam puan zar hnuaiah lungrual takin an leng ho a ni, a ti.

Har Ghar Tiranga rual hian Sorkar laipui chuan in tina faina leh thianghlimna, Har Ghar Schwatta kengkawh theuh tura India khua leh tui tinte a ngen a ni.

Vawiina Vanapa Hall-a hnam puanzar ngaihhlut inzirtirna hun a tel Lahruaitluanga chuan India ram chu ram ropui tak anih zel a beisei tih a sawi a ni.

Serchhip ah chuan vawiin khan Tiranga Yatra neih a ni a. School naupang te, college zirlai te leh mipui mimir thahnem takin kawng an zawh a ni.

Kawng zawh khar nan Serchhip DC Pisapui tualzawlah intawkkhawmin Bawrhsap Pu Paul L Khuma chuan chuan a ho a, Kawng zawh hi hmun hnih atanga bul tanin chawhnu dar hnih (2PM)-ah an chhuak tan a. Serchhip College peng atanga kal tan te leh P&E Veng Mini Park atanga chhuak te chu IOC Venga Serchhip Pisapui panna kawngah an infinkhawm a, kharna inkhawm tawi buatsaih zui nghal a ni.

Vawiin vek hian Serchhip DC Pisapui Hall kawtah leh I&PR Conference Hall ah te India Independence Day vawi 79na pual Photo Exhibition neih chhunzawm nghal a ni a. August ni 7 leh ni 8 ah te Exhibition hi tum 3 huaihawt a lo ni tawh bawk a ni.

Siaha ah chuan vawiin khan Hnam Puanzar Kawng zawh hi Vaihipi Playground atangin Bazar Traffic Point thleng neih a ni a, mi 700 chuang kal chhuakin hun kharna programme tawi Bazar Traffic Point a neihah District Bawrhsap Pu VL Hruaizela Khiangte kalkhawm mipuite chu India in zalenna a neih hlutzia hre thar turin a fuih a, Independence Day lo thleng tur chu hlim leh lawm taka hmang theuh turin duhsakna a hlan nghal bawk a ni.

Saitual District ah pawh tukin khan hnam puanzar chawimawina leh a hlutzia inzirtir tharna, Har Ghar Tiranga 2025 campaign pualin zirlai naupang ten kawng an zawh a. Naupangte hi CI kawn, Saitual leh Keifang kawn atang kawng zawh tanin, Keifang Centenary Complex-ah an intawkkhawm a ni.

BJP Mizoram chuan 'HAR GHAR TIRANGA' pualin vawiin khan Aizawla War Memorial, Zodin Square-a mi chu tihfai hnatlang neih a ni a.

India ram Independence Day vawi 79-na pual hian Mizoram chhunga BJP District hrang hrangah pawh hun hman a ni a, naktuk hian India hnam puanzar nen 'Two-Wheeler Rally' nei tura ruahman a ni bawk.

<><><>

PWD MINISTER

PWD changtu Minister Pu Vanlalhlana chuan NH 44-A Lengpui atanga New Eden Road paltlangtu kawngpui thawmthatna atana sum ruahman cheng vaibelchhe 48 leh nuai 63 chu sorkar laipuiin a pawmsak a ti.

Minister han a Social media-a a tarlan danin sorkar laipui a Ministry of Road Transport and Highways changtu Union Minister Nitin Gadkari-a hnena thu a thlen angin ministry chuan Mizoram khawthlang lam ram Tripura kalpawhna kawng thawm thatna atan cheng vaibelchhe 48 leh nuai 63 ruahmanna chu a pawmsak a ti a, he kawngpui thawm that tur hi a vai a belhkhawmin kilometre 53.3 a thui a ni a, kawngpui

siam hna hi hmun nga a then niin he hna then zingah hian Dapchhuah leh Dampui inkar kilometer 20 chu a thui ber a ni.

<><><>

AAP

Mizoram Aam Aadmi Party chuan Mizoram-in sorkar a hrawn tawh zawng zawng te'n vawiin thlenga tuialhthei dahkhawlna (oil depot) mumal an la siam lo chu mak an tih thu an sawi.

Mizoram Aam Aadmi Party hian vawiin khan thuchhuah siamin, Mizoram chu India ram hmun kilkhawr a awm a nih ang aia a mamawh em em thinte ngaih pawimawh a ni lo thin chu a thinrim thlak tak zet an tih thu an sawi a. Tuna ZPM kaihhruai sorkar chuan chhuanlam siam lova a rang lama siam vat tur in na takin an ngen a ti.

Mizoram AAP chuan tuialhthei a kaihhlak hlek changa petrol pump zawng zawng te sorkar in a khuahkhirh nghal vat thin chu mipui chanvo rahbehna dik tak a ni an ti a, he thilah pawh hian sorkar hnuai thuneituten mi pawimawh tak leh vantlang chung a leng ang hial a an awm thin chu khamawm an ti tih an sawi a, Mizo mipuite kalphungthar tiamtu ZPM sorkar chuan henge hi chhu chat tawh sela, essential service department mamawh bak zawng zawng chu mipui tana semzai thin tawh turin an phut tih an sawi.

Mizoram AAP thuchhuah tarlan danin, an Mizoram-ah The Petroleum Act, 1934 leh The Petroleum Rules, 2002 kenkawh a ni lo hle a, mipui mimir tan a tuialhthei lei tur a awm loh laia man to zawk a lei tur a awm reng si chu mak an a, tun hnuah ZPM sorkar chuan mipui mimir tan tuialhthei an semzai thei dawn lo a nih rau rau chuan mipui te banphak awmchhun phalna nei lo a zuar ho zawng zawng te chu tuialhthei zawrh chhuah phalna pe vek tura an phut law law thu an tarlang tel bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

HIGH COURT JUDGE PROBE

Lok Sabha Speaker Om Birla chuan kumin March thlaa a chenna ina pawisa tam tak an chhara avanga eirua puh High Court Judge Justice Yashwant Varma chhui tur member pathum awmna committee a din. Vawiin chhun dar 12 a Lok Sabha rorel inkhawm tan anih hnu lawkah Speaker Om Birla chuan Committee din anih thu sawiin an report hi a hma thei ang bera thelut turin a hriattir a ni.

Speaker chuan Justice Varma ban tirna tura rawtna hi vawiinah pawmin he rawtna hi sawrkr lai leh oppsition MP 146 laiin hming an ziah hnan thu a sawi a.

<><><>

SEMICONDUCTOR

Sawrkar laipui chuan Odisha, Punjab leh Andhra Pradesh-a Semiconductor project cheng vaibelchhe sang li leh 594 senna tur a pawm. New Delhi-a chanchinbumite kawmin Union Information and Broadcasting Minister Ashwini Vaishnaw chuan Prime Minister Narendra Modia hova Union Cabinet thukhawm chuan he project hi a pawm a ti a. Semiconductor leh electronic sector lama hmasawna thlen turin nasa taka tan lak anih thu a sawi a.Kum 11 kalta chhung khan electronic thil siamchhuahna lamah a let ruKin a pung tih a sawi a.

<><><>

ONOE

Lok Sabha chuan One Nation, One Election Bill ngaihtuahtu Joint Parliamentary Committee report pek hun tur a pawtsei. Committe hian thlasik thutkhawm 2025 chawlhkar tawp berah he report hi a pe dawn a ni.

<><><>